

彭澤縣志卷之五

學校

學制  
冒考  
冒捐  
附籍

條規

學田

書院

考棚



昔先王之治天下也先之以養卽繼之以教而學校之制興焉唐虞三代以來或鄉國異其地大小殊其名迨至有周而法大備自天子以下至於卿大夫士之子及凡民俊秀皆入焉故其時風俗醇懿人才蔚起上以此教下以此應也自是而後聰明才知之士競趨於刑名法術縱橫捭闔之途豈人才之不古哉善莠廢而學校缺有由然也我

國家

聖學淵深甄陶備至由京省下逮郡縣莫不有學又

令創興書院建立考棚所以作育人材洵足遠紹唐虞超軼漢晉觀於彭而見邳治之隆焉志學校

學制

縣學舊址在縣治東半里崇儒坊元末燬於兵明洪武間知縣黃安泰主簿孔希直就此創建正統成化間知縣鄧周凌杞徐俊相承修建宏治癸亥都御史林俊臨縣視學基背陽向味大不利諸生因請遷於今鳳凰山麓左建先師廟兩翼東西廡次廟門次泮池次櫺星門右建明倫堂三間進德齋三間修業齋三間二門三門外門三間外門右爲教諭宅一區櫺星門外爲泮宮牌坊一座右爲訓導宅二區知縣王澄董其事正德己卯逆濠遊兵寇縣焚

泮宮坊櫺星門及二訓導宅至嘉靖壬午知縣曾棠出藏金重建櫺星門二訓導宅而泮宮坊遂廢嘉靖七年戊子知縣柯遷建敬一亭於櫺星門內右豎宸翰碑七通十一年壬辰建

啓聖祠於明倫堂左癸巳知縣戴璋增修教諭張一言置科貢題名匾而規制壯麗按學制外爲都宮先廟後堂名宦鄉賢例祀於內今以地窄故廟堂左右相峙雖名宦鄉賢亦爲別藏歷嘉靖四十四年乙丑分守少叅馮公謙臨學見基址湫隘弗稱乃檄署縣事本府郭希泰勳庫藏易民居以充擴之經始而未就緒至萬歷三年乙亥知縣雷時敏於廟廡堂齋舍廨之屬靡一不新建文昌祠於儒學

門左豎櫺星門而柱以石萬歷九年辛巳署縣事葉朝榮於櫺星門外豎爲屏牆標以騰蛟起鳳萬歷二十七年己亥知縣鄒思明重修明季兵燹之後蕩爲瓦礫

國朝順治丙申知縣董襄重建康熙己酉知縣李遙修建聖殿四周以磚爲牆無檐宇櫺福不類廟宮之制康熙辛酉知縣王廷藩到任謁廟之日傷心茂草隨與教諭潘若騰訓導羅懋德議修採佳石於江南購巨材於楚地壬戌歲正月興工先建廟門三間次建東西兩廡各六間廟門兩傍各一間左爲名宦祠右爲鄉賢祠次建櫺星門三空華表坊以白石爲之雕鏤雲物皆極精巧又撤聖殿舊牆易以櫺福增以檐宇以壯厥觀啓聖祠明倫堂悉

皆修葺泮池葺以磚石牆垣塗以丹雘至本年冬月工畢廟貌煥然一新矣其費悉出捐俸勸募提學高瓚郡守陳秉化捐俸首倡王令廷藩暨潘羅兩學博百計經營紳士樂助維時生員王應昌朱大鴻朱有珍丁自南鄉約王棟暄歐陽坤卿汪宗柝周仲文等督修至雍正六年知縣李祖旦教諭杜道坦倡首重修興建兩廡大成坊櫺星門俱各煥然增新臨階豎坊二座顏以德配天地道冠古今乾隆四十九年知縣高蟾以舊制較隘與合邑共商擴開基址公捐興新修建大成殿兩廡各祠櫺星門修砌泮池改大成門向移建正齋署以其址改建崇聖祠舊祠改爲忠烈祠豎德配天地道冠古今坊牆宇悉加丹雘

廟貌巍然煥然儒學頭門內青雲樓前丁名恭喬捐貲鼎建奎星閣嘉慶戊辰年邑紳歐陽整捐貲修葺大成殿大成門兩廡各祠暨德配天地道冠古今坊

明宏治癸亥知縣王琦遷建明正德丙寅知縣王澄立石提學邵寶記予既記九江屬邑瑞昌之學而郡守高君友璣以政至南昌遂率彭澤教諭戴鑾來告曰比者彭澤瑞昌二學同時並徙彭澤先瑞昌畢工而記尙缺敢以爲請初彭澤學在邑之東議者謂背陽向昧位置弗當擇所宜徙乃得今地記者曰前山爲案爲帽爲髻後爲鳳凰爲綠梯爲蒼崖爲潛玉爲讀書巖羣勝具萃左襟孤峯右帶重嶺而大江之流舉目望之盡數百里爽秀完傲學於是爲

稱時都御史林公俊以巡視至聞而然之分守叅議董君威錢君顯叅政楊君守愚僉事沈君元王君啓陳君雍副使楊君錦繼廣其志而高守任焉以有茲成功也予嘗怪今師生之爲學不務力本而泥風水妨科名動輒請徒故多抑弗許然學之於治大矣而去陋就嘉亦有司常職此所謂同行異情者吾故弗敢廢焉於其成也能無慶乎雖然學所以學道也昔者孔子之語道多矣而直指親切莫如川上之嘆蓋合理氣顯微一言蔽之而所以爲用功地者卽是而在萬世之學道者此其的矣天下之大川四而江爲首觀水於江非他川比也今彭澤之學旣據江爲勝而吾夫子肖像在廟凡爲師生而從事於斯者盍相與追

川上之遊求源於深擬進於漸期委於大修爲天德發爲王道而慎獨以始終之則所謂道者蓋不假諸儒衆說而可自得於觀望之間矣今夫江自大禹疏鑿以來其起合流匯之道蓋未嘗一日改也或者不求其故顧於偏溪曲港力求通焉而曰入海由是雖東之之勢終必有至而支離已甚况徒勞而無歸者又往往若是乎君子之於道也何以異此夫志水者必自禹貢而後可得其真六經論孟吾道之禹貢也不是之務而安於偏曲雖亟稱於水亦於學乎何有哉宮室之成古有頌禱頌禱於學舍道無可語者故於考成之餘擬取川流之旨爲我師生告焉

柳邦傑記治化闢乎文運文運之興衰視學校之修廢我

朝開國以武功定天下以文教興太平學校之設遍於海宇治化之隆固其所也百餘年來守令繼代哲愚靡同其間屈力殫慮於學校者固多而苟具文藝者亦有矣彭澤縣學舊在山之東北宏治間提學二泉公因其圯壞改立於山之西南讀書巖側宮牆門廡整然備具正德己卯夏六月江西寧賊倡亂攻九江安慶等處彭澤遂爲兵火之場儒學惟存大成殿及兩廡而已再踰年辛巳蜀進士曾侯棠來視縣事謁

廟之日見四壁蕪莽惻然憐怛嘆曰此有司之過也又以殘破之餘民力凋敝財無所出因捐已俸先建櫺星門次贊泮池次及講堂解宇之屬經營表度自任其勞黜堊丹

漆舉如故法生徒在學者分立五會以督之講解有則約束有條舉業師專而道德之說曉如也子第在鄉者拔其俊秀以教之六藝之文羣書之理必親自教訓焉是以爲治不踰數月而政教漸舉矣明年壬午夏二教朱君復以公事至郡詢於余曰會侯修學請爲文以記之可乎予曰可夫節義者士君子立身之大閑知之不明守之不固履焉者寡矣予聞侯之在江陰也輕徭薄賦視民如傷權奸江斌以威劫之而畧不動容下錦衣獄一年而亦不折腰凜凜正氣超出凡流其注意於首善之地者得非有定見有定力而推廣之哉且彭澤之先有淵明之靖有懷英之忠督郵不見千載人仰其高免租一疏百世民懷其惠豈

彭浪孤山之靈常來忠義者以爲之主耶侯適將北上矣他日澤破先靈功施社稷晚節之完永終之譽有出於晉唐人物上者又今日崇高孔子而願學之意也予不佞敢因侯作新吾徒之善而併及侯之忠義俾吾徒爲臣盡忠爲子盡孝而不託文教於空言則庶乎其入德而於治化有補矣

嘉靖丙寅分守少叅馮謙重修尙書雷禮記彭澤居彭蠡下流濱大江阻疊障自漢置縣以來再徙爲今治迺江西東南咽喉之地國初建學負東山定基對鳳凰山嗣遷鳳皇山下東向本山峻石崖崿景稱幽雅爲風氣鍾萃獨學前近迫大街塵肆障塞堪輿家忌之又基址湫隘不稱賢

制闔縣士民久議欲擴充之以無主其事者不果舉值分  
守少叅益川馮公按臨本學顧瞻歎然而言曰人才興  
於學校而迫隘若此其何以挹靈秀廣賢才耶遂就鄉先  
生檄查官地曠閑者倍丈尺以易民廩并括府縣庫貯無  
礙官銀給遷民及修理之費由是民無重遷而宮牆以外  
規模敞朗改觀肇工於嘉靖丙寅至隆慶丁卯告成士民  
胥嘖嘖頌戴益川作興盛舉相與寓書於都諫柏菴歐陽  
君刻石以識其事柏菴述狀屬記於予予惟我朝開設學  
校養育賢才而必廟祀孔子取其所刪述古語者時訓  
迪焉凡以教之明偷求其不悖孔子之道也嘗觀聖人論  
人以隱居求志行義達道爲未見及稽元守周錯於彭澤

合祠祀陶狄二賢有記云使後之君子隱則當以淵明爲  
式仕則當以狄公爲師至邑令王國輔又取陶之靖狄之  
忠建靖忠書院以淑來學豈不謂二賢靖忠庶幾於求志  
達道者哉人之所以自立於天地間以大倫之克全也淵  
明念累世晉臣於宋受禪記事惟書甲子恥不事二姓梁  
公充望雲思親之心終能反周爲唐稱社稷純臣是出處  
無愧於大倫要在誦孔子之遺言而措之力踐不徒清風  
仁澤垂之彭澤而已欲明乎大倫以體孔子之道其能無  
感於二賢矣乎夫田野叟非有詩書漸濡師友勸勉談  
及二賢前事則忻然動慕至過其祠而展拜焉又莫不肅  
然起敬於此見良心之同至正明達人人可爲陶狄而希

乎孔子者也今選一縣之俊秀羣肄學中使之誦法孔子  
講明人倫以資世用又得益川加意作興捐庫貯易民居  
以充擴學基較之合祀二賢崇建書院孰非以求志達道  
望來學者耶矧學基充擴必假資易居而後成其成之固  
不易也益川志在以得仁賢爲寶毅然無所吝惜使二百  
年不脩之制而脩於一旦諸士業講明倫則所謂求志者  
求吾之志也達道者達吾之道也固不假乎外求矣誠仰  
體朝廷之所以養育與益川之所以作興者爲何如加重  
又思平日之所以仰止陶狄者爲何如敬慕時時檢點以  
己之心而迎陶狄之心以陶狄之心而迎孔子之心則知  
賦歸去詞者卽接浙而行之義委曲事武后以收反日之

功者猶獵較爲兆以行其仁者也由是修身以明倫窮經  
以致用務求靖不失乎淵明忠有光於狄公則求志達道  
克踐乎孔子之言於國家建學育才之意亦徵之於寔效  
矣異日仁賢彬彬迭出謂非有以倡之也哉益川名諫浙  
江慈谿人孤山名湛柏菴名一敬俱由本學進士孤山任  
浙江憲副柏菴任兵科都給事中協心一德共成此舉於  
世教均有補云

萬歷乙亥知縣雷時敏重修勞堪記洪武詔郡縣得置儒  
學與上國齒有司以時葺其宮牆而程督弟子意遠矣其  
後博士教不先弟子或歲月一至講席有司一意治簿書  
無問縫掖宮牆汚萊何論教士彭澤學舊背東山後徙鳳



皇山前面東山嗣以隘弗稱稍擴舊址然規制仍陋而向  
又不當堪輿家且歲久宮圯櫺門不表講堂階序不治將  
無所俎豆而絃誦之也萬歷三年夏邑令雷君時敏請於  
郡守李君司馬宋君司理馬君爲聞之學使莊公兵憲魏  
公又上其事於前中丞楊公今中丞潘公侍郎張公皆曰  
可乃出藏金飭材始事以典史余善臣護作四年秋七月  
廟廡門堂泮池講舍官廨之屬各以先後就緒象布輪奐  
咸若更始令祭菜先師告成事名博士弟子而諭之曰二  
三子之居是也其學維何賈居市農居野而士居學賈謀  
利農謀食而士謀道居不同不相爲謀也而世之人率貴  
士而賤農賈非以其謀哉顏子士於魯而屢空好學聖獲

孔子伊尹士於有莘非義不取而堯舜君民爲王者佐志  
伊學顏士乃可貴今士習卑卑多舍所學而謀利雖刀必  
爭雖居學其心乃在市也士名而寔賈也日而謀食疇蹴  
弗計雖居學其心乃在野也士名而實農也及得時而駕  
以農賈之德而位公卿大夫必不任矣何者賈以自利而  
不可以利天下農以自食而不可以食萬民所以利天下  
食萬民惟正其誼不謀其利敬其事而後其食者能之則  
士之學必有大異於農與賈者而後可用之大故學不  
可以不大大也是故韋布切廊廟之憂憂不在廊廟者不憂  
也匹夫抱當世之慮慮不在當世者不慮也學於仁義孝  
弟之途性命陰陽之理以養其德學於取與交際得失之

間以養其氣學於言語動作食息游晏之頃以養其身學於禮樂文章政事弓矢馳驟之節以養其才學於天人事物之變皇帝王霸之跡以養其識學於琴瑟管絃歌誦之音以養其性情由是崇之卿相而不爲秦抑之匹夫而不爲卑加之大任而不動投之大紛而不亂臨之大節而不奪譽之而不喜毀之而不愠惟以利天下養萬民不負所學著名實於無窮此非志伊學顏而有道之士乎哉此士之所爲可貴也夫皆曰謹受教於是博士汪守廉與其貳林雲龍劉思請記勞子曰堪嘗被命爲督學使使蜀所以風厲諸生卽今之諗於多士者也今言脩矣受而次之鐫諸石

萬歷己亥知縣鄒思明重修許汝魁記彭爲縣最古自晉唐來蔚聲簡冊而庠址尤勝蓋其後數峰俯仰狀若飛鳳從千仞岡展兩翮而下面峙二峰相拱向傍聳天馬山矯首霄漢江中孤山屹立斯亦天造之奇矣堂側石壁間有涪翁太史題字摩娑石勒如見其人堂廡宮牆門戟陞階初未嘗不犁然整也無何歲久漸以傾圮合茲土者率皆遞爲因循日不暇給遂至榱桷崩摧規制弗脩適鄒侯綰符綬而來謁廟之日不勝其恫乃亟斥贖鍰之餘爰庀費宮爰葺齋舍徙名宦鄉賢兩祠於戟門左右悉革其故而改觀焉役甫竣侯罹內艱且浩然往矣博士弟子不勝去思念其弗表於後請於署縣事司理萬君走牘白下徵記

不佞予惟國家之需於士也當佐命則高翊戴之勛際熙朝則遜斧藻之烈蓋若斯其重也故黷宮不飭負在令飭而業不加修負在士負在令祇失其所爲有司於士習無壞也負在士將世道人心隨以轉移甚且以一人而禍天下吁此當時得失之林也予竊鄰治稔侯之善政難以更僕數而其下車獨先崇飭學宮可謂深得國家重士之意粵稽漢庭良吏僅僅勸民力田興學咸以治行課最天子爲賜璽書進秩封爵侯不啻遠過之若多士沐侯之愛辱侯之教不患無所居矣將狎昵微逐脂韋一生爲向者山川之羞乎抑爭自濯磨務通經學古脩國家緩急之需俾茲庠益增而勝乎藉令做秀才時不以天下爲己任而所

執業於身心性命了無關涉卽日佩其師訓無輟晦明似亦彬彬雅士也然徒以雕蟲藻艷自雄無尺寸建白裨益盛世國家亦奚賴焉是猶負在士也矧終歲不一至講席弁髦其師土苴其業此其人品賢不肖又何如雖然彭庠旣據大濱爲勝而孤峯砥柱其左必有微惠川嶽之靈其學治博無涯其志行奇峭弗拔佐聖明泰寧之理與方正忠諫諸先達步武相踵者予故有感於侯之作人而致其規勸之意若此

國朝 順治丙申知縣董襄重修記天下郡邑之建學而祀先師孔子也蓋將以聖人之道教其士以及於民使天下後世咸得被先王之澤如古盛時也三代以降聖道之

東澤縣志 卷之五  
不明久矣韓子曰火於秦黃老於漢佛於晉宋魏齊梁陳  
之間嗣是而後表章六經以崇聖學莫盛於宋與明故風  
俗之美軼漢與唐及其衰也高者驚於元遠卑者溺於詞  
章士競以趨於功名喜文章爲急而不思躬行實踐講求  
於聖人之學士習壞而風俗因之先王之澤漸滅殆盡噫  
聖道之不明久矣先師孔子之言曰道不遠人子臣弟友  
之庸行尙歉然以爲未能而子與氏亦云堯舜之道孝弟  
而已矣則先王建國興學之義寧有外於是士奉先王之  
教修其身以教於家而出而措之天下唐虞三代之化雖  
至今存可也襄以愚陋無聞承乏茲土初至謁 學宮僅  
存明倫堂三楹移祀先師其中殿廡遺址彌望榛礫瞻拜

之餘怛然不寧因卽謀之諸紳議重修與楊何兩廣文各  
捐俸爲首倡諸紳士慨然有同心諸士復議捐兩年優免  
銀助工費請之當事咸報可乃庀材鳩工先議創建大成  
殿如舊式始於丙申秋暨丁酉之夏六月工乃成因躬率  
諸生禮請先師神主而釋菜焉而啓聖兩廡齋舍及鄉賢  
名宦之祠尙以時詘未能舉而襄於是冬亦間命左遷愧  
前功之未克旣也且愧未以聖人之道爲諸生相切磨以  
移風易俗而鞅掌簿書竟匆匆以去終不免於俗吏之所  
爲也因書數言於石以志予愧後之君子有同志焉拮据  
以卒厥事時省而修葺之無俾傾圮全諸士人之有志聖  
賢之學者有所講肄以修其身以善其俗則襄之所厚望

也

康熙己酉知縣李遙重修記康熙七年戊申七月余筮合彭澤視事三日後循例謁文廟惟時禮生唱拜起完事畢矣廣文先生亦循例同起拜無他語予起立視見文廟四壁皆木爲之心猶深稍停立以新舍不諳風土事宜未便遽問迄闕朔望拜如儀余謂廣文曰余中州人先聖先師廟歷見者多矣未有以片木爲之者堅好何如借廣文入視見四壁碎裂上下日光透耀余歸而嘆曰豈爲政而忍先師露處乎學宮鞠爲茂草衰晚式微時也今聖天子方崇文重道何遽至斯守土者之過也謀之廣文廣文曰昔蒞無資謀之諸生諸生曰歷年久遠苦限年費

差之累窮措大方捉襟露肘矣先師曰謀道不謀食難言之予歸而重嘆曰豈爲政而忍先師露處乎一飲一食一立一坐一夢一魂恍恍惚惚如有失者世俗作官人動言捐俸俸果何多乎動言措辦措辦二字豈易言耶爲治不在多言頷力行何如耳謂余廉未能飲黃泉食槁壤也謂予貪盜蹠之泉渴死不就也蒞任之明年率何兆祺周臣乃兩明經也爰修先師廟廟制不用玲瓏轉角摹殿儀爲之蓋彭地窄人衆茅宇連軌不時常警火災乃飭工匠自基徂檐胥用磚石封砌慎之也櫺星門外始置照壁兩旁始樹木檻始建兩坊書德配天地道冠古今八字至兩廡之闕如戟門之零墜泮池甬道之胥沒於荒烟蔓

草未及徐圖而官以鐫級去矣然歷南嶺登小孤山巔城隈數里外見赤光映日與綠水楓林互相照耀者蓋孔子廟也予心慰矣至廓大完美尚有賴於後之君子因嘆曰今世人見一衲一緇持鉢盂畫僊佛菩薩像無論男女倡和隨喜施銀錢釵釧甚至捐踵頂罄家私不顧也試看今世浮圖插天金碧輝煌豈曰愚夫爲之縉紳家方且奔走如鶩也問伊福利何在不曰前劫則曰後世趨舍如此可怪也亦可悲夫

康熙壬戌知縣王廷藩重修熊一瀟記學校之設尙矣先世厥祀彝夔崇禮樂也二者僅分道之一曲失則偏嗣是釋菜姬公而配以孔子尊制作也顧先聖先師異其

稱南面東面異其位失則謬自唐宗祧姬公而專宗孔子親臨釋奠俾尼山之道炳如日星而統始正自明太祖詔天下郡邑置學絕徼殊荒隸版圖者皆漸於聲明文物之化而教斯廣抑自世宗用永嘉議始撤塑像而易木主去王號而稱先師啓聖有祀推崇自由正先賢之複謬黜諸儒之瑕玷而道益尊嗚乎歷世愈久聖烈彌光至我

皇朝文治日隆超邁千古封狼用殲文武協和大法小廉民物康阜山陬海澨咸知嚮學惟是彭澤洋官舊負東山復遷鳳皇山下昔固完好矣閱百有餘年悉就傾圮雖襄水李令改修聖廟而正殿而外若廡若門若祠皆無存

焉將鬼然孤峙而無輔之爲尊乎抑先師南面而臨者  
僅配哲十數弟子而諸賢皆不及門乎噫神其恫矣不寧  
惟是今之梵宮道觀繙黃者流所以奉其師者率如王者  
之制重檐複閣金碧丹漆五色絢爛映日奪目而聖廟  
獨就卑陋其何以妥靈爽肅俎豆乎文運方啓有開斯承  
三韓陳公來守九江屬邑承風百廢具舉會辛酉夏五王  
令寶蒞茲土下車之日謁聖廟於茂草惻然心傷卽與  
兩學博商興舉之宜顧里役未均民替替在湯火中疾呼  
而望救王君曰富而後教聖訓也遂以均徭請於上得報  
可初彭澤額外之征倍蓰什伯於正賦十年一役蕩產猶  
將不給徭既均里民輸納正賦外無絲毫溢於額王君曰

可使富矣盍議教乎夫膠序者士之宮也縫掖者民之倡  
也彭澤被陶狄遺風宜興起於百世之下而民顧蔑禮踰  
閭父子許於庭兄弟訟於邑彼悍然不講於名義者蓋陋  
膠序而輕縫掖以致然也迺以修學請於上又報可於是  
學憲高公捐俸以倡太守陳公主其政王令董其役學博  
潘君羅君襄其事爰及紳士以逮里民皆鼓舞樂助以成  
其舉於是飭材木採文石計瓦甍度經費料工役先成廟  
門次成東西廡名宦鄉賢二祠之成次之櫺星門之成又  
次之壯厥觀矣然後增修聖廟檐之複者若獸奮吻角  
之飛者若鳥張翼宏厥制矣肇工於康熙壬戌正月至冬  
而告竣何其神也固至聖之澤不泯於人心抑亦王君

之惠有以致子民之應也先是王君旣興學以施教而欲  
驗民之率教與否一日郊行見髡髻之未掩者往往填委  
於山崖水涯之間亟出貲買地僱役以瘞之而民相率應  
命由是十八都之中無復暴露之朽骨王君曰民之服教  
此見一斑矣及學成而民父子兄弟之間果不侔於曩昔  
又當廟門初建塗之以丹中門現方文如印章者六以告  
王君弗之信也次丹左門現印文二十有四或方或長王  
君臨視色喜曰建學以興文治其纍纍若若之先兆乎此  
其事近誕而非誕也夫學文事也建學盛舉也彭澤之學  
旣速於成而民又樂趨於教由均徭以富之於先故從善  
輕也 先師之靈昭昭在上印文之現其必有徵春秋不

言事應而未始不紀灾祥其事應固可類見也士誠益絃  
誦於學以服王君之教則爲

國家樹人材自茲始也於縮符也何有余忝與彭同梓里  
當學之成紳士合詞請余爲之記余不敢辭而敬述所聞  
於父老者如此泐諸貞珉其亦可以不朽也已若夫所以  
爲教之方則有太守陳公之承宣師帥暨王令君潘羅兩  
學博之朝夕提命非余所敢知也

潘若騰序自昔侯王設邦啓土建學爲先蓋以天下之大  
非權力智術所能攝服惟建學明倫以禮義生其心而動  
其翻然勃然之感初不待權力智術自有以動其天良耳  
但當時學宮釋菜莫不以作君而兼作師之寄義農以降



未有定主迨其後孔子倡道東魯多士景從天下翕然宗之然則繼往聖以開來學非孔子其誰自是魯城之褻太牢之祀漢高追崇著於史冊至今尊爲至聖不敢爵也祀以木主弗敢神也聖道昌明萬世如一天下後世之尊崇孔廟厥維由舊嗟乎高山景行心竊嚮往夫非高聖人之風宗聖人之道哉倘天下後世其爲行不淑而身不修欲以質對聖人幾何其不爲聖人之所拒也卽尊崇廟貌尸而祝之猶之乎不得其門而入若是乎孔子之尊奚以廟爲雖然詩賦城闕刺學宮廢也禮有之王者化民成俗必由於學是以大昕之視皮弁之祭承師拜道之文隆於天子况其下焉者乎然則聖人之宮牆其立於天下後世俾

勿壞者蓋以使天下後世之人共知儀型之不遠也無如後世知尊聖人而悖聖人者仍復不少則聖人之道與聖人之學反在晦明絕續間故推尊聖人者必爲之崇其廟貌尸而祝之庶幾天下後世雖不見聖人人聖人之廟如見聖人焉由是觀之聖廟之修烏容緩焉

今天子崇儒重道以廣勵學宮爲最予謬膺

簡命課士於彭見彭學廓庶蕩然門垣傾圮 聖殿僅存

風雨不蔽有志修崇而未逮乃未幾王令君蒞位觀梁木

其壞惻焉心傷首重建學之務是予心之欲成者得王令

君而竟成之也時有請者曰學基鳳巒時後二峯拱前石

鐘天馬相爲左右環學皆山也宜重新以光形勝又曰彭

邑科甲絡繹不絕今也寥寥以學宮頽敝之故由前所請則爲飾觀由後所言則爲祈應而予之意匪直此也今與王令君及鄉城士庶共議各捐貲重修俾聖殿煥然改觀多士其得仰聖人於廟更期修身砥行崇理學以黜浮習務實有以尊聖人之道而服聖人之教使人人各脩身砥行以底於聖賢庶於廟貌之崇有合也又豈僅崇聖人之廟焉而已哉是爲序

康熙戊辰增脩邑人劉曉記郡國建學由來尙矣故遐荒僻邑莫不有庠序以爲教育人材之本今天下教化興行聖天子方崇儒重道親幸闕里

御書萬世師表之額以頒賜學宮宇內之菁莪蔚起樸樸

裁成皆彬彬乎嚮化從風而家絃戶誦猗歟盛哉我彭邑地在吳頭楚尾處於大江之濱檣帆上下絡繹載途乃孔道所必經者明季左師欲襲金陵而彭邑適當其衝屠掠焚燬靡有孑遺學宮官舍祠宇市廛悉爲瓦礫榛莽之場

自

本朝宇鼎之後哀鴻甫集誅茅構椽而鬻序亦初成規制然歷卅十年來又幾經寇盜蹂躪殘摧闕茸勿治者久矣椽題覆椽塗墜漶滅敗垣半立筵几盡廢雖時與勢會遂成荒落然亦曩之合吾邑者皆傳舍其官以甌脫此泮宮耳予每見梵宇叢祠稍有罅漏則主僧不憚奔走匍匐乞緣善治而奕奕膠庠乃同於道傍築室豈惟崇祀之典儀

有缺卽吾黨士習恐亦於此不振耳昔文翁之在西蜀創制學宮而化比鄒魯殷衰之在榮陽廣築學館而民興禮讓是必賴有賢令長以一邑之事視爲己事庶不至傾敗蒼葦也昨歲六安王公來宰是邑慨堂廡之就圯隱文治之未彰曰是予之責也夫力圖脩繕用嚴秩祀乃告諸邑人士共相輪助而料木斲飭匠工時不違農賦不益額民不加役易朽爲新而不改其舊庶幾乎可漸覩落成矣旋以註誤解組去茲幸我溧水端木公以聖門之賢裔爲棲棘之鳳鸞三年宰邑萬戶蒙庥善政流風卒難僕數而土風丕變文教聿興催撫之暇則進邑中諸弟子而程較之以歲時謁奠文廟惟謹顧念前令之遺緒未竟忤

然瞻懷自甘蕭矩曹隨克善其後牆垣門閭丹雘煥然予復捐俸而發泮池建石欄以增飾其外觀從此士氣振而文教興苟非遇賢令尹如前後兩公者砥名飭節以爲多士倡又何能復睹夫威儀雍肅有如此之盛哉是役也兩博士南城潘君虔南喻君皆朝斯夕斯以共勩厥成並勒諸石

雍正戊申重脩熊暉吉記彭邑夫子廟坐鳳皇山面雙童孤峯蠡水之奇環帶左側秀靈所萃人文蔚起由來舊矣予雖未親覩其勝而家君會彙鐸是邑因側聞庭訓知之爲最悉云廟建自有明之季年久傾圯間有補葺不過仍舊規稍爲完好而已嗟乎以聖靈依憑之所道教本原之

地顧一任其陋穢荒蕪毫不關念者誠何故哉蓋綠邑之有司曰勞心簿書而不暇修司教者曰昔菑寒種而不能脩弟子員亦曰力微事鉅而不敢議脩夫既明知其當修而羣焉藉口如是尙安得有修之之日耶歲甲辰邑侯李公下車卽議修葺值前學博瓜期瞬屆而家君遽賦遂初議不果行然未嘗不念茲在茲大懼人材放佚無以副邑侯德意焉逮歲丁未新建杜君計偕入都旋奉旨特授司鐸杜君爲吾鄉先達名儒覺菴先生嫡嗣淵源有自品潔而文豪其光明磊落之概予蓋久矣心儀之竊意邑有賢侯又得賢司鐸爲之貳家君之有志未逮者其必能相與以有成也况逢我

皇上崇儒重道百執事興賢育才而巡憲劉公刺史蔡公慨然以脩郡學爲己任風示有位多士鼓舞奮興敦崇根本余更知賢如邑侯暨學博諸紳士決不藉口於不暇修不能修與不敢議修矣今春禮闈彭之諸君子北上以廟告成謁予而請爲記因爲述杜君抵任與邑侯留心文教不數月遂倡此舉凡會計出入省試百工罔憚勞瘁而首事諸生亦莫不仰承意旨協謀同力卽朝夕饗殮之需無敢動支錙銖毫末費省而功多予是以得悉其詳而深幸家君之有志未逮者今果能相與以有成也因思學校文教之地而一邑者天下之象也重熙之治不遺於方隅禮樂之興見端於葦爾方今

聖天子在上敬禮

先師追王五世不惜厚發帑金重新曲阜廟宇誠敬格天慶雲兆瑞於以見我

朝文教之隆允足超越千古而景運聿新正未有艾今彭僻處江濱而沐浴雅化廣大麟宮卽茲一邑可見天下矣詎不謂盛哉斯舉也肇自戊申秋八月越明年因賓興大比未竟其功今歲乃得踴躍竣事計工若干費若干殿宇仍舊者煥然改觀祠廡鼎新者巍然壯麗櫺星門則玉立干霄大成坊則暈飛曜日補其缺畧大其規模美富重光宮牆整飭此雖彭之紳士商民解囊樂助而微邑之父母李公孰與肇其始微邑之師傅杜君孰與肩其任且微邑

之首事諸生孰與勩其成猗歟休哉是豈獨家君之志用以克遂而聖域賢關妥

先師以振道學者豈淺鮮哉余雖固陋寡聞敢不次其巔末以記焉劉公諱均號秉一任饒九南三府分憲蔡公諱

學顥號伯程由甲午鄉魁歷任永新縣以才望簡守此邦李公諱祖旦號辰齋由乙未進士令彭杜公諱道坦號肯

亭甲午科舉人沈公諱國策號潛菴以明經司訓首事諸

生廩生歐陽燧副貢周煥奎生員田裕歐陽賞廩生洪國梁生員歐陽福歐陽伸龍歐陽汝達丁春等類皆敦厚朴誠之士家君每道及之今俱不憚經營而共襄茲務者例

得次其姓氏而識於碑陰

乾隆戊寅知縣曹師聖重修記師聖自任彭澤旣禮謁  
文廟周旋堂廡大懼歲久弗修椽題頽折無以肅觀瞻而  
生警發爰諏學博朱君司訓溫君謀所以新之請於各上  
憲進邑人而董其事殿庭堂廡益宏以深移

崇聖祠於舊基之前若干步 文昌閣遷建於明倫堂之  
上與書巖近外闢青雲之路廣濬文渠宮牆內不爲瀑水  
所浸且尊經有閣缺者增之師徒講習之地隘者擴之構  
兩學師公署於明倫堂左右學中規制式煥聿新進諸生  
而謂之曰爲學之道其視諸此矣夫學校之設首重明倫  
而人倫之明雖塗人孺子因其天性時有合焉而學士大  
夫恒未易責其備何則施之有次第爲之有本末大之一

出一處小之一作一止皆性分中事卽皆人倫中事也大  
學論綱領條目巨細兼賅而自知止至於能得由知意身  
心達之家國天下朱子誠意傳章句云功不可缺序不可  
紊爲能櫛括其旨中庸推言天命以及人事末復由下學  
歸之天載總樞紐一誠以智仁勇三達德行君臣父子夫  
婦昆弟朋友之五達道其喫緊爲人處則第十二章發明  
道不可離於鳶飛魚躍見上下之察程子謂卽孟子勿忘  
勿助意思推諸學記之藏修游息詩之緝熙光明書之遜  
志時敏大易之知至知終庸言庸行極之善施德博胥是  
道也諸生入學釋菜春秋釋奠 先師以成事告得以時  
習禮其間甚盛典矣而師儒又月集之而課其業相與講

明約束砥礪磨礪今者仰瞻榱桷俯躡堂基熟睹夫黜陟丹雘爲之必要其成成之必有其漸有基承之勿壞久道要於日新其於聖人無行不與之教殆亦有會心不遠者歟况彭邑面臨大江千里一碧而小孤爲之砥柱以成迴盤紆折之觀環山堆堞蜿蜒如龍而學宮又依鳳皇山麓其他環抱若觀音鏡子諸山千態萬狀莫可名言山川磅礴鬱積之氣必有人焉出而當之昔之官斯土者陶狄趙三公之風節動業旣家尸而戶祝矣而孤標子特陳后山先生其尤也雖極盛者難爲繼然有司牧之責者固將聞風興起以爲閩邑倡邑人士得無意乎而數百年來生於斯土能卓然自豎者後先相望若曾公之事業歐陽丁

公之建言王公之經術

本朝若袁公之文章政事劉公之父子濟美忠烈尤彪炳史冊其他人文指不勝屈今之人豈遂異於古乎方今聖天子廣勵學宮多士得賢師儒以爲倡導念平日誦法有年講求所以爲學之道以上副國家興賢育才培養人文至意夫學校不尊育才無地有司者之責也而學術不明行誼弗立亦修士之耻也有志之士奮興宜何如矣

乾隆甲辰知縣高蟠重修記彭邑人文夙稱盛矣蟠嘗披閱志乘所載氣節事功後先相望者多由制科出乃知鍾靈孕秀賢官爲發跡之原則謀所以煇耀門牆而裔皇規

制者不特章縫之責亦守土者之先務也蟠自縮組西江  
所至以振興文教拳拳加意今秋奉  
簡命來蒞是邑甫下車卽祇謁

先師周覽廟貌侷非不猶美而內址曠蔓外觀無耀楹  
星門偏倚不正殊失大中至正之體且屏牆前迫促無餘  
塵居壅塞氣局復未恢宏瞻眺時不勝菁華闔晦之歎詢  
之兩學博僉云邑紳士庶咸志改造蓋盛舉有待焉越旬  
日紳士等果以是呈請藩益歎人心之同不待家喻戶曉  
自有若合符契者夫梵宇琳宮叢林大利在緇納之流尙  
不惜勞動以確麗其觀學士平民中慷慨施予亦曾不聞  
有吝色况

聖域賢關之地規模宏擴固崇祀體制所宜凡在含齒戴  
髮之倫孰非被服

聖教中人具此生理同爲激發當無不劇金樂助者又奚  
待蟠之諄切勸諭乎聞之志氣所動有開必先邇來是邑  
甲第稍遜於前山川靈秀之氣鬱久而洩而人心之蒸動  
實兆其端今果輸財殫力鼓舞將事堂廡高華規模正大  
有志而事竟成矣卽此精神淳發已兆人文先聲鳳翥聯  
翩蟠將爲邑人士預券之也是爲記

學宮自南唐遷縣時建於髻山下背陽向昧明宏治二  
年改建鳳皇山麓卽今之定址也但門向甲卯對雙童  
峯不正形家多云不利科甲今更正卯向兩峯對空其



大殿則仍舊兩廡則擴開禮門前購買胡姓店以便取  
向大成門前左至衢高世俊第世傑塚去已店通前直  
後讓基七尺學以隍廟前右側汪光叙租住高屋公基  
相換公私兩便矣至儒學頭門內奎星樓係丁名恭捐  
造共費三千八百餘金明倫堂雨棚係獵戶袁姓捐銀  
五十兩助造正齋原在堂東因通大殿不便移建副齋  
前其原基安置 崇聖祠舊祠改祀忠烈堂西羅屋係  
丁名該買捐坐下艾基亦捐學以何住艾屋後公基少  
許酬艾正齋新基原係高世傑屋今歸學造其屋價銀  
八十四兩悉銷樂輸旁下餘基陽宅賃租學師收解院  
費學後山薪兩齋刈解學租所栽松樹官民均禁私砍

學門東廂每年租銀叁兩學師收春秋增頒府庠生胙  
肉學前兩邊衣店丁春買捐聽拆西邊牆外店學買無  
貲轉典丁春銀貳百肆拾兩交價租撈丁收後當設備  
贖回此重修權宜通變捐買更換之原委也併記

大成殿奉祀

至聖先師孔子

國朝

聖祖仁皇帝康熙二十三年

御書萬世師表匾額懸各學大成殿三十八年

詔各學設樂器二十五年

御製

至聖先師贊二十八年

御製顏子曾子子思子孟子贊俱

頌學勒石

先師贊曰清濁有氣剛柔有質聖人參之人極以立行著  
習察舍道莫由惟皇建極惟后綏猷作君作師垂統萬古  
曰惟堯舜禹湯文武五百餘歲至聖挺生聲金振玉集厥  
大成序書刪詩定禮正樂旣窮象繫亦嚴筆削上紹往緒  
下示來型道不終晦秩然大經百家紛紜殊途異趣日月  
無踰羹牆可昭孔子之道惟中與庸此心此理千載所同  
孔子之德仁義中正秉彝之好根本天性庶幾風夜曷哉  
令圖邇源洙泗景躅唐虞載歷庭除式觀禮器摘毫仰贊

心焉退金百世而上以聖爲歸百世而下以聖爲師非師  
夫子爲師於道統天御世惟道爲寶泰山巖巖東海泱泱  
牆高萬仞夫子之堂孰窺其藩孰窺其徑道不遠人克念  
作聖

顏子贊曰聖道早聞天資獨粹約禮博文不遷不貳一善  
服膺萬德來萃心齋坐忘其樂一致禮樂四代治法兼備  
用行舍藏王佐之器

曾子贊曰洙泗之傳魯以得之一貫曰唯聖學在茲明德  
新民止善爲期格致誠正均平以推至德要道百行所基  
纂承統緒脩明訓辭

子思子贊曰於穆天命道之大原靜養動察庸德庸言以

育萬物以贊乾坤九經三重大法是存篤恭慎獨成德之門卷之藏密擴之無垠

孟子贊曰哲人既萎楊墨昌熾子輿闢之曰仁曰義性善獨闢知言養氣道稱堯舜學屏功利煌煌七篇並垂六藝孔學攸傳禹功作配

五十一年

特諭升朱子於十哲之次五十三年

詔以宋儒范仲淹從祀

世宗憲皇帝雍正元年

命追封

孔子五代王爵將啓聖祠改爲崇聖祠各省學宮建忠義

孝弟祠仍建節孝祠於學宮之外二年

命增定從祀先賢先儒復林放蘧瑗秦冉顏何鄭康成范甯增縣直牧皮樂正子公都子萬章公孫丑諸葛亮尹焯魏了翁黃榦陳淳何基王柏趙復金履祥許謙陳澧羅欽順蔡清陸龍其增張迪入崇聖祠增仲弓伯牛子張有若四家博士三年奉部

頒文廟禮樂圖籍四年

御書生民未有匾額頒懸各學五年

諭直省內外逢

先師誕辰一日齋戒

命諱

孔子名加卩爲邱

高宗純皇帝乾隆三年

御書與天地參區額頌懸各學

皇上嘉慶三年

御書聖集大成區額頌懸各學

東配

復聖顏子

魯人名同字子淵

魯國之後明嘉靖九年改稱

述聖子思子

名伋

字子思述事聖祖嘉靖改稱述聖子思

西配

宗聖曾子

名參字子輿

魯南武城人鄒國之後嘉靖改稱

亞聖孟子

名軻字子與

魯公族孟孫之後洪武五年罷配享踰年復之嘉靖改稱亞聖孟子

東哲先賢

閔子損

字子騫魯人明嘉靖改閔子以下俱稱先賢某子

冉子雍

字仲弓卽伯牛之宗族

端木子賜

字子貢衛人

仲子由

字子路魯之卞人

卜子商

字子夏衛人

有子若

字子有魯人乾隆三年升配

西哲先賢

冉子耕

字伯牛魯人

宰子子

字子我魯人

冉子求

字子有仲弓之族

言子偃 字子游吳人

顓孫子師 字子張陳人

朱子熹 字元晦世為婺源人康熙五十一年升配東哲末位乾隆三年改移西末

東廡從祀先賢

蘧子瑗 字伯玉衛人澹臺子滅明 字子羽武城人今蘇州有澹臺嗣豫章有澹臺門皆其遺

跡原子憲 字子思宋人南宮子适 字子容魯孟僖子居南宮因姓

瞿 字子木漆雕子開蔡人若司馬子耕 字子牛梁子鱣 字子產漆雕

魚齊冉子孺 字子魯伯子虔 字子祈冉子季 字子產漆雕

子徒父 字子有徒魯人漆雕子哆 字子欲一公西子赤 字

華魯任子不齊 字子文魯人選公子良孺 字子正家語作儒陳八

堅 字子仲魯人 鄔子單 字子家 罕父子黑 字子素 榮子旂 字子

禘 一作左人子郢 字子曹 鄭子國 字世徒魯人 原子亢 字子籍

原亢籍廉子潔 字子庸衛人 叔仲子噲 字子期家語作會魯人 公西

子輿如 字子上 邾子異 字子欽 陳子亢 字子禽陳人 琴子

牢 字子開與子桑步叔子乘 字子車秦子非 字子之顏子

噲 字子聲顏子何魯人 縣子賈父 字子象家樂正子 名克

弟萬子章 孟子弟子 周子敦頤 字茂叔世居濂溪 程子顓 字伯淳河南人 邵子

雍 字堯夫河南人

西廡從祀先賢

林子放 字子邱宓子不齊 字子賤魯人為單父宰著宓子十六篇 公冶子長

魯人 字子長 公皙子哀 字季沉 高子柴 字子羔 樊子須 字子遲

商子澤 字子秀一作季魯人 巫馬子施 字子期 顏子幸 字子柳 曹

子郵字子循 公孫子龍字子石 秦子商字子丕 顏子高字子

驕魯字子循 壤子駟字子徒 赤字子徒 家語石字作蜀 子成字子明 秦公夏子

人字子乘 后子處字子里 奚子容字子哲 顏子祖字子

公祖子句茲字子之家 語燕子 祖字子思 樂子欬字子

作欣字子義 狄子黑字子 孔子忠字子 施子之字子 常字子 申子根

子蒧字子尚 顏子之僕字子叔 施子之常字子 申子根

魯人字子 左子邱明字子 史倚相字子 秦子冉字子 張子戴字子

之後與琴張字子 公都子字子 公孫丑字子 張子戴字子

曾皆為友字子 弟字子 弟字子 弟字子 弟字子 弟字子

程子頤字正叔 明

東廡從祀先儒

穀梁赤周末 伏勝濟南 后蒼東海 董仲舒廣川 杜子春河

人字子 范甯字武子 晉韓愈 字退之 范仲淹字希文 蘇

海寧人楊時 字中立 羅從彥字仲素 先世自 李侗字愿中

張栻字敬夫 將樂人 羅從彥字仲素 先世自 李侗字愿中

趙復字仁甫 吳澄字允 許謙字益之 薛瑄字伯

內王守仁字伯安 羅欽順字允 陸龍其字稼書

西廡從祀先儒

公羊高周末 孔安國夫子十 毛萇漢趙 高堂生漢魯 鄭元

縣字康成 東漢諸葛亮字孔明 王通字仲淹 司馬光字君

人歐陽修字永叔 胡安國字康侯 尹焯字彥明 一德字

祖謙字伯恭 萊人南蔡沈字仲默 建陽人陸九淵字子靜

陳淳 字安卿 龍溪人 魏了翁 字華父 卬州 蒲江人 王柏 字會之 金華人 許衡 字仲平 河內人 金履祥 字吉父 婺州 蘭溪人 陳澧 字可大 都昌人 陳獻章 字公甫 新會人 胡居仁 字叔心 餘干人 蔡清 字介夫 晉江人

崇聖祠奉祀

肇聖王木金父公

詒聖王防叔公

裕聖王祈父公

昌聖王伯夏公

啓聖王叔梁公

配享先賢

顏氏 諱無繇 字路 顏子之父

孔氏 諱鯉 字伯魚 子思子伋之父

曾氏 諱點 字子皙 曾子參之父

孟氏 激 公宜 魯公族 孟孫之後 孟子軻之父

從祀先儒

周氏 諱輔 成 周子 程氏 諱珦 字伯溫 二程 顛 頤之父 蔡氏 諱元定 字季通 蔡沈之父

朱氏 諱松 字喬年 朱子熹之父 張氏 諱迪 張載之父

乾隆十八年改建柯友桐記

崇聖祠者爲 至聖先師之所自出 報本上祀而作也 考

孔氏家譜 聖父 聖母 禱於尼邱而夫子生是 聖父

聖母 德足以感天地山川之靈而篤生聖人爲萬世師表

非偶然也 蓋自天地開闢以來 氣運隆厚 五帝唐虞三代

皆疊出聖人至成周文武而後及春秋六百年始出先師夫子所稱祖堯舜憲文武而集羣聖之大成故雖不得位於當時而尊之爲萬世師表考歷代崇祀西漢始立聖廟至隋唐始立啓聖祠而以七十二賢配享至趙宋始尊顏曾思孟四大賢再闕十哲同升廟堂崇祀其餘諸弟子至列從祀東西廡漢唐以後諸儒從祀先賢位下至元明又以濂洛關閩諸先儒同祀而以顏曾思孟四大先賢及濂洛關閩自出諸先儒配享祠內蓋屢朝之重聖道而附從祀諸先儒若此至

本朝雍正元年啓聖公加封王爵稱爲啓聖王又上四代各有王號改稱崇聖祠故生在贛所見贛府各學皆然

彭邑 聖廟立於城西鳳皇山下 啓聖祠立於 聖廟之右明倫堂之左年久未修桁桷朽壞喻丁兩學博念啓聖爲 聖師所自出 啓聖神位不安卽 先聖神靈不安商之同學諸生門世業等各募貲財鳩匠重修起工於壬申之冬月至癸酉之上浣而工告成竊念釋門諸弟子募修庵宇佛祠者一邑之中常有數處而 聖廟及祠之一所吾輩庠序諸生皆聖門之弟子目覩 聖祠之壞敗其可安心以不修乎今幸祠宇重新可以安 啓聖之神位卽可以安 聖師在天之靈而吾黨皆聖門之弟子亦誰不目覩而心快乎是創修者之力與募修者并助修者之功之不可沒也余爰爲之記其事鐫石垂諸後俾後



之重修者有所感發而興起也故誌之喻君諱湖南昌人  
丁君諱士偉貴溪人首事生員周世業廩生丁凱生員田  
興迪廩生高作霖生員汪燕生員王璽生員周濂廩生歐  
陽琴生員王安生員歐陽輝舉人歐陽正亨貢生丁春貢  
生周世永生員歐陽仁生員歐陽汝瑞等共襄勤勞皆得  
書名於後

名宦祠在大成門外左奉祀

晉陶

侃

都督

明王思任

分巡道

國朝高

璜

學政

白

璜

巡撫

晉陶

潛

唐狄仁傑

南唐

廖凝

宋陳師道

馮扞

元趙昂發

元曹靖國

王國輔

明黃安泰

鄧周

常完

凌杞

徐俊

何士鳳

曾棠

柯遷

戴璋

劉廷賓

朱公節

程鳳金

高裕

陳夢斗

於可成

朱子恭

許伯鵬

白紹光

張於廉

國朝董

襄

李遙

以上知縣

南唐吳

舉

宋葉永齡

顏希孔

元馮克敏

以上

宋石

振

元和裕

焦從善

以上縣尉

明殷

啤

何綸

張一言

余桂萼

趙善鳴

曠用賢

以上學諭

鄉賢祠在大成門外右奉祀

宋張夢祥

高天錫

元陶毓璋

明黃信

王奎

歐陽尚誠

歐陽尚八

王劉隆

王守中

丁湛

陽一敬

王演疇

曹文緯

洪維幹

劉日曦

周禮嘉

歐陽剛

艾琳

歐陽美

陶圻

國朝劉曉

劉鎮寶

忠孝義祠在明倫堂前右奉祀

忠

宋顏希孔

元劉受二

明歐陽尚誠

歐陽尚八

王廷幹

洪維幹

凌守誠

國朝劉鎮寶

汪銓

孝

明李時

王守中

義

明時邦曉

節孝祠在縣署左土地祠前今移學署明倫堂左前奉祀

明畢彥昇妻鄭氏

歐陽尚八妻李氏

劉淦妻黃氏

柯茂妻王氏

宋永華妻歐氏

王守邦妻陶氏

計 偉妻劉氏

計如垣妻朱氏

程 綱妻王氏

馮世亨妻柯氏

陶欽民妻江氏

計如玉妻謝氏

丁與祺妻陶氏

計成能妻王氏

柯 嫌妻黃氏

王佳傳妻陽氏

馮士翼妻丁氏

王錫節妻石氏

劉 健妻畢氏

王秉陽妻洪氏

許近萬妻查氏

陶養化妻時氏

國朝凌基元妻歐陽氏

洪自許妻歐陽氏

朱昌邦妻丁氏

柯在揚妻屠氏

項秉芳妻汪氏

胡文光妻江氏

樂舞生 附

乾隆五年奏准各省府州縣學樂舞生每學遵例舞用六  
佾卽照佾舞之數額設三十六名外加四名以備疾病事  
故更替之用務令各該州縣會同教官考選本籍俊秀通  
曉音律嫻習禮儀者方准充補遇有缺出另行考選足數  
仍造冊申報學臣查核每遇學臣接臨免其府縣兩試由  
教官冊送府縣叙入考案之後申送院考憑文錄取

乾隆六年八月十六日奉布政司詳准部覆樂舞生除原  
照六佾舞數定爲三十六人外加四名以備更替是爲佾  
舞而言至歌章秉器之生原有常數但不得太浮相應咨  
覆查照定制酌量辦理今酌定實需用樂舞生一百二十

名其餘備補之數樂行裁汰

乾隆八年三月十三日奉部覆樂部大臣莊親王等奏議定各省 文廟樂舞生除祭丁仍用欄衫雀頂外其常服帽頂俱許用銀盤起花銀頂不得僭越

奉頒存學書籍

上諭六種各一部 文武相見儀注一部 名教罪人詩

一集

欽定周易折衷一部 書經一部 詩經一部 春秋一部

性理一部 日講四書一部 部頒明史一部

學政全書一部 樂章一集 四書文一部

御批資治通鑑一部 授時通考一部 訓飭州縣規條

一部 祭文一冊

文廟圖冊一本 先賢先儒并陳設印刷單二紙

乾隆七年巡撫陳宏謀檄發綱鑑正史約一部

大學衍義輯要大學衍義補輯要各一部

孝經註解一部 小學纂註一部 近思錄一部

呂子節錄一部 四禮翼一部 養正遺規一部

從政遺規一部 訓俗遺規一部 教女遺規一部

八年頒發豫章學約一部

學校條規

順治九年題准刊立臥碑置於明倫堂之左曉示生員

朝廷建立學校選取生員免其丁糧厚以廩膳設學院學

道學官以教之各衙門官以禮相待全要養成賢才以供朝廷之用諸生皆當上報國恩下立人品所有教條開列於後

一 生員之家父母賢智者子當受教父母愚魯或有非爲者子旣讀書明理當再三懇告使父母不陷於危亡

一 生員立志當學爲忠臣清官書史所載忠清事蹟務須互相講究凡利國愛民之事更宜留心

一 生員居心忠厚正直讀書方有實用出仕必作良吏若心術邪刻讀書必無成就爲官必取禍患行害人之事者徃徃自殺其身常宜思省

一 生員不可干求官長交結勢要希圖進身若果心善德

全上天知之必加以福

一 生員當愛身忍性凡有司官衙門不可輕入卽有切己之事只許家人代告不許干與他人詞訟他人亦不許牽連生員作證

一 爲學當尊敬先生若講說皆須誠心聽受如有未明從容再問毋妄行辨難爲師亦當盡心教訓勿致怠惰

一 軍民一切利病不許書生上書陳言如有一言建白以違制論黜革治罪

一 生員不許糾黨多人立盟結社把持官府武斷鄉曲所作文字不許妄行刊刻違者聽提調官治罪

一陶學易長樂坂田叁畝零陸釐租穀陸石

一宋錦玉榮宇若十二都田租穀拾石地租銀柒錢叁分

一汪于禮江于茂黃花坂田租穀貳石地租銀貳兩

一高顯土地租山租銀貳兩鷄各一隻菜豆各壹斗

一項家山田貳畝捌分租銀壹兩陸錢

一柯秉凡湖西壠田地拾伍畝伍分捌釐額租貳拾伍石

地租銀貳兩

學門外右基地貳間額租銀壹兩陸錢其餘內外左右基

址悉載學冊共額租銀肆兩起解 學院項下

湖西壠田原係學內文昌閣收租因前縣喻銜後新創

文昌宮爲邑吏藉名所侵失額已久於康熙五十四年

有郡廩生歐陽燧增生汪國璇正直端方素爲邑望同  
生員陳天錫等釐清學田呈學詳府經署府安斷歸學  
內之文昌閣立有碑石此田歸學皆燧等力也 舊志

新增學田

一十五都黃土嶺劉廣運門首下坂田壹坵計壹畝捌分

又一坵計壹畝陸分熊家墩水田大小伍片共計貳畝又

一坵計貳分伍釐堰叁分段家大塘壹分伍釐草塘壹分

又汪家塘地壹畝貳分又婆婆墳地共伍片又孟家洲地

一片共計壹畝陸分係生員汪元魁所捐

一三十都黃鶴壠水田壹坵計貳畝陸分一坵計貳畝捌

分一坵計玖分一坵計四分 四號合作一坵本  
田壠下堰水澆陸 又皮匠灣

乾田壹坵計肆分又黃家灣陸地大小伍片共計貳畝係  
監生洪國柱之妻陶氏所捐

氏生三子長光第幼光策皆入縣庠次光符亦列成均  
不幸相繼而亡氏不忍子名湮沒捐產入學請詳各憲

批允勒諸貞珉用垂不朽云

舊志

湖西壠學田碑記自古學田之設所以崇學校也而號畝  
爲田地之實紀數不可不明數定則租有成規斯垂永久  
而無弊湖西壠學田一所原屬彭邑公產歸學以作支用  
其田地坵段號片新舊兩志未及詳載僅註租利志亦不  
符卽所註畝分又與實數不合有疎畧之處遂開欺隱之  
竇以致佃戶瞞吞日久嘉慶二年例貢王立本倡議具呈

釐清未果迄嘉慶八年立本之子監生美涵因鄉民朱達  
土指明田地實數獻單在學途繼父志不惜捐貲會同武  
舉歐陽佐增生時雍生員計煥章生員張炳煌廩生柯選  
琴廩監歐陽元廩生何士喆生員柯因培等稟縣勘丈幸  
逢邑宰陳公昌祚急公崇學准委捕廳嚴公文英會兩學  
師吳公凌鳳易公軾臨田逐一勘明五十號共計田貳拾  
叁畝壹分與志載之數較長陸地柒畝有零又查出柴山  
貳墩魚塘壹口半志遺未載者俱已清出繪圖開明詳案  
從寬飭令該佃照畝科租屆期輸學向之久爲瞞吞者今  
返而歸公矣學校其有裨乎第恐歷久弊生爰勒諸石以  
爲炯鑑將所清田地分別鐫石土名坐落概著分畝號片

不迷於以表今茲之釐清永定亦以杜後日之欺吞復萌也厥後閭邑鉅公重修縣志覽碑詳載俾學田永存不失云

李家壠

水田壹畝柒分 坐馮坵塲上

水田壹畝陸分 坐斗七田塲上

水田伍分 東一畝坐大鼎口

水田叁分 坐黃竹籬

水田伍分 坐西塲松樹嘴

水田貳分 坐西塲

水田陸分 坐大塘背

水田伍分 坐長塘灣以上水田八坵俱大塘陰

水田肆分 坐大塘背栗樹嘴塘陰

水田肆分 水田壹畝壹分 水田壹畝 三坵俱坐栗樹

嘴俱栗樹嘴塘陰

水田叁分 坐東塲

水田捌分 坐大塲二坵俱學塘澆蔭

魏家壠

水田肆分 坐本壠上塘口本塘澆蔭

乾田叁分 四分田角上塘蔭

陸地六分 坐本壠南

李家壠



西塆乾田肆分 乾田叁分 俱大塘蔭

陸地肆分 陸地叁分 俱坐西塆

陸地貳分 陸地壹分 俱坐長塘嘴

東塆乾田壹畝 坐大塆學堂口本塘澆蔭

陸地貳片計五釐 俱坐乾田後

陸地叁分 係學庄基

陸地捌分 陸地貳片共陸分 陸地捌分

陸地叁分 俱坐庄基上下手

劉賢壠

下塆乾田肆分 坐下塆口

陸地叁分 坐乾田四分棚上

陸地貳分 陸地叁分 陸地陸分 陸地叁分

陸地伍分 陸地貳分 西壹畝

陸地壹分伍釐 陸地壹分 陸地貳分 東壹畝

陸地柒分 俱坐下塆

乾田肆分 陸地叁分 坐下塆叔婆塘西塆

大塆腦陸地肆分

蕨箕塆陸地叁分

老張壠陸地肆分

油匠塆乾田叁分

庄基後柴山壹畝 下塆嶺柴山壹畝

李家壠大塘一口三股內壹畝

大塢塘壹口

係學獨管

以上田地俱坐三十都湖西壠境內水田共壹拾伍坵計壹拾畝零陸分額租穀貳拾伍擔乾田陸地叁拾伍片計壹拾貳畝伍分額租銀肆兩整新米貳斗鷄貳隻乾隆三年奉

上諭各省所有學田銀糧原爲給散各學廩生貧生之用但爲數無多或地方偶遇歉年貧生不能自給往往不免饑餒深可憫念朕思伊等身列膠庠自不便令有司與貧民一例散給嗣後凡遇地方賑貸之時着該督撫學政飭令教官將貧生等名籍開送地方官核實詳報視人數多寡卽於存公項內量撥銀米移交本學教官均勻給散資

其餽粥如教官開報不實給散不均及爲吏胥中飽者交督撫學政稽察卽以不職叅治至各省學租務須通融散給極貧次貧生員俾沾實惠此朕體恤生員之意若生員等不知感激自愛因此而干預地方恃有生監護符以致肆行種種不法之事該督撫等仍應照例查察毋使陷於罪戾

鹿田碑記彭澤春秋丁祭向用鹿脯供自獵者四十八戶由來舊矣嘉慶三年衆戶因鹿脯難得求以羊脯代之士林不服彼此控爭各憲均批仰縣會同儒學妥議至嘉慶六年衆戶自願捐貲置買鹿田五畝每年計納租穀拾擔伍斗以備購買鹿脯之費士林欣允息爭定案所有田畝

暨由學管理核算之規刊刻於石永垂不朽焉  
一號水田壹坵計四畝東至汪田南至屯田西至劉田北  
至江田其田係大塘并水窟又蓮花塘共澆蔭計塘米肆  
分

一號水田壹坵計四分東南至劉田西北至江路其田係  
大塘澆蔭塘米四釐

一號乾田壹坵計陸分東至澆蔭塘南至高田西北至汪  
地其田係李家塘陸釐澆蔭

一每年丁祭或鹿脯難得用作歲脩若干并除夕元旦油  
燭若干由學師開除

一每年額租穀拾擔伍斗豐年不加凶年酌減

一每年各項開除總於十二月上旬城中管公首事到學  
核算由學師申報

書院

靖忠書院

在縣治北觀音山後元邑令王國輔建取晉陶  
潛之靖唐狄仁傑之忠明一統志今祀

共學書院

在縣署後文昌閣右今祀基存邑侯吳士宏捐  
建

敬業書院

在泮池右雍正二年教諭彭濱捐建

彭濱記學以造士也以義名者公之乎造士也郡邑有學  
矣云胡不公而必義學之爲蓋郡邑之學學使者於歲科  
試拔童子之尤者補弟子員置其中既有常數矣外此皆  
不得與學而有力之家得以私設塾齋延師聚友美材而  
琢成之本自易易乃有英品偉才足與有成而或生計窘

迫寒瓊淒冷卽或安心體粥而欲質經北面竊恐脩脯之無資或至廢棄抱卷嗟嘆無可如何噫人才難得自古爲然聖人之所以曲成不遺

盛世之所以培養不倦者蓋爲是也則公以造之於義學所不容已矣予以荒謬濫膺彭邑司鐸彭俗醇謹子弟率多彬彬雅子每以舉業經義相接而一勗以古道幸諸君子不以予言爲迂由是以共砥礪於有成也予亦藉以大慷於衷焉因思予之所得相接者無幾而彭邑子弟多美質其中豈無貧無師資者苟使善爲之所而多方以成之他年鼎鉉之任黼黻之才安知不出其中而竟坐觀廢棄不能爲

朝廷曲全人材以待時用予亦與有咎焉幾欲急建義學設師長以公教之乃以頻年修葺 聖殿及諸祠齋署祿薄不給有志未逮中懷歎歎者有年矣迨今將解組領囊適餘數金頗足構造數椽因鳩工建義學於泮池右以償夙願有笑者曰子去矣此費儘可壯行色而烏用是學爲予曰子誠得公教於彭人無棄材以待後之好義者恢而廣之且公之於不替予志遂矣予雖清風兩袖而所取以歸者多矣是爲記

柳州書院

在北郭柳林洲乾隆三年知縣李松泰建其原委詳方輿志

春衣書院

卽柳州書院知縣曹師聖取柳汁染衣意改名

嘉慶甲戌年重修春衣書院知府方體記潯郡五邑自濂

溪書院興惟彭澤有書院向日柳洲今名春衣乾隆三年  
戊午前令北平李松泰建於北郭外之柳洲所以興教化  
培文風也詳考志乘碑記柳洲自明迄今歷有興廢李令  
恐年久弊生乃捐廉爲士民首倡拓地數百弓建立書院  
及三賢祠附塾芥重二字號洲爲興學資詳請勒石觀其  
自記云事由創始一切規制均有未備而敦教宏化之大  
觀尙有待焉閣廿餘載曹潘二令有志興行以資費竭蹶  
未果三十四年己丑邑生員周世祿妻陶氏捐入田產繼  
有次第踵捐者歲甲午晉安葉聲遠攝邑篆加意文教首  
重書院解俸錢延師課讀每慮士無膏火室廬湫隘慨然  
以振興爲任邑紳丁名恭捐出字號洲息同州同高世俊

董其事勸輸修建折腐起頽改大門正西向建講堂堂之  
左右建學舍各二十餘間其南向廳肖祀三賢像於上堂  
後置賓師館規模始備矣未幾講堂大門災庚戌年胡令  
率德率紳士重建亦僅於門堂故址累土高之餘皆窪陷  
未治數年來圯而修修而圯者恒數數見嘉慶辛未予因  
公至彭見書院地濱大江屢受水患而芥重二字號洲久  
坍塌無息念士人居業必有寧宇前人成功未可輕廢因  
以丁世馥同艾欽赤凌健所捐入濂溪書院寒宇八號洲  
息分撥十股之四入春衣書院首事周之泰等取息修葺  
繼長增高循舊制而更新之自講堂師館學舍廊廡及庖  
廚涵澗之屬皆繚以牆垣築以隄塹周完堅好几案器用

咸具規模又再備矣夫書院以造士也古者黨庠術序皆舉鄉先生之有德行道藝者董之其大旨所存總欲使人明天理正人心篤於學問化其剛柔之偏以漸幾乎中正而明體達用一一見之實效也若於聖賢經旨之所在不脩明經學以深求底蘊此而謂士則何士也且夫彭澤爲陶靖節狄文惠趙忠毅三賢過化之區其氣節文章忠盡理學真是焜耀古今爭光日月皆前事之師也今之爲師與爲弟子者誠能奉爲楷模澄心希古淪性靈崇氣誼反求之切近篤實而不溺於利欲趨於險怪則士品士氣士習蒸蒸日上不猶有三賢之遺風歟今春三月署令金匱秦綱武以儒術飾吏治觀風校士錄取生童送入書院肄

業酌量資息出入聘師主席興膏火定課程給資有期經費有式其他規條悉仿濂溪蓋所以造就士人者差備事定命董事宗培印等同諸生請記予嘉其請因思培風育才固上之人所望於下亦下之人所當自力且喜春衣之能繼濂溪興起而更冀其將與濂溪並垂久遠也諸生勉乎哉

周陶氏捐田地入書院知縣高尚禮記國家振興文教郡邑皆建書院延師課讀以幾菁莪棫樸之隆猗歟休哉彭邑之名於郡屬爲最舊有春衣書院一所歲入洲租六十餘金不足敷膏火費予履任後勉首事倡率衆首事然余言務共襄厥事適有周陶氏毅然呈請田地租捐入書院

以佐膏火吁巾幗中識解若此洵可嘉也以視較量錙銖者度量相越不甚遠耶陶係生員陶建常之女歲貢周九凱之媳生員周世祿其夫也于歸八載夫終子逝光年方七歲長曳青衿旋登鬼錄媳劉氏吉郡萬安司鐸鎮朝女相繼云亡六歲孤孫昌玉零丁成立聰明特達淹貫經史方期繼續書香無何玉樓遽召遺腹曾孫甫一歲又殤孫媳歐陽氏國學生汝常女感太姑志誓死靡他今復云殤僅餘八旬老母一身繼立曾姪孫福祖祧祖業付嗣孫領管所有自置田地孝先惠下除撥各祖祭祀各女妝奩併衆姪讀書資斧外更欲爲夫男若孫成身後之名因爲是舉夫陶氏撫孤三代守節五十餘年茹苦甘淡續置糧數

書院產業

擔復能好義行仁若此余嘉其志特爲詳請各憲批准給匾以旌慈善更用勒石以垂不朽

- 一 鐵爐山周虎形山斜對面水田九坵共捌畝肆分獨塘澆蔭乾田伍坵共肆畝小扎壹個陸地叁拾伍片小扎叁個共貳拾畝零壹分瓦庄屋壹重上下貳進計基肆分
- 一 四都炮場地方陸地拾叁畝庄屋壹重
- 一 監生鄭源等控歸山地玖墩共計壹拾貳畝伍分坐落回都沈灣寨河泗攏卷在工房

一 生員周世祿妻陶氏批捐水田玖坵共計伍畝陸分伍釐陸地貳拾玖片共計拾畝陸分陸釐俱坐八都東山攏

庄屋壹重又水田壹坵低田貳坵共計陸畝柒分同坐橫山橋山場塘基稻場在內卷在禮房

一 生員徐權監生徐華光案結歸入山澗田地叁拾餘號共計貳畝伍分坐落七都古樓潭鷹窠庵下

卷在刑房  
畝在徐姓

一 職監高世俊契買謹晏水田玖坵計玖畝干田伍坵計肆畝陸地肆拾片計貳拾叁畝俱坐二坊阮家均萬家嶺下庄屋壹重柴山貳面獨塘壹口破號堰叁口草湖壹墩契在禮房

一 生員柯光澤呈捐水田叁坵計貳畝柒分干田肆坵計肆畝貳分陸地貳片計壹畝貳分俱坐落一都將軍廟螺獅山下茅屋四間新造瓦屋伍間卷在禮房

一 監生高演軸妻張氏詳捐湖地叁方與汪陳王三姓共分六股內二股坐落二坊鵝頸灣口高家山下大灣大地蛇壠三處卷在戶房

一 貢生胡懋璉捐入東關外油店前橋頭大路邊二則水田肆坵共計肆畝肆分澆蔭堰壹分契壹紙

一 買受胡拱廷東關外閑家橋上下等處水干田共伍畝肆分伍釐柴山壹墩澆蔭塘堰共叁分印契壹紙又老印契肆紙

一 知府方體漸歸僧易明募置山田拾壹畝伍分地壹畝伍分卷在儒學

一 買受汪成綬韋家壠等處田地共計貳拾壹畝肆分澆



蔭塘壹畝壹分柴山併坐山共壹畝庄屋壹重基地捌分叁釐印契壹紙

一知縣秦樹慶批斷汪王二姓互爭十五都黃土寨柴塢山橫丈三百六十五弓歸入書院管業

一員沈洪照控捐柴塢山入股內貳股叫名柴凸塢契壹紙

一買爰余世宏子孫攸德仁等東山壠內柴山壹面叫名內

反培印契壹紙

一芥字壹號坐落四至股分見卷二至乾隆二十三年大丈弓步亦同卷二增課銀至捌兩捌錢迄嘉慶二十三年大丈全冊註冊

一重字壹號柳洲學股坐落四至見卷二至乾隆二十三年大丈計長壹千捌百弓廣壹千叁百弓積貳百叁拾肆萬步課銀壹兩貳錢四分至四十八年大丈長如前廣捌捌百陸拾弓叁尺肆寸積壹百伍拾陸萬貳拾肆步計陸拾伍頃壹分增課銀至拾貳兩肆錢叁分伍厘嘉慶二十三年大丈計長壹千壹百貳拾伍弓廣貳百陸拾弓積貳拾玖萬貳千伍百步共拾貳頃拾捌畝柒分伍厘減課銀至伍兩玖錢叁分伍厘在冊

一重字貳號坐連壹號西至大江南至大江東至光字號分水為界北至重字壹號乾隆二十三年大丈計長貳千貳百弓廣捌壹千壹百弓積貳百肆拾貳萬步共壹百頃

捌拾叁畝叁分叁厘零課銀壹錢叁分叁厘叁毫叁絲叁忽至四十三年大丈計長貳千弓廣陸百玖拾叁弓積壹百叁拾捌萬陸百柒共伍拾柒頃柒拾伍畝增課銀至壹兩肆錢伍分叁厘叁毫叁絲至伍拾叁年全冊註冊

一淡字壹號坐落復源洲與眾姓共分柳洲學貳拾貳股半內得壹股西至江南至重字壹號上截水濠東至重字一號下截水濠并珠字同三直下北至江嘉慶三年大丈計長叁千肆拾弓廣伍柒百弓積貳百壹拾貳萬捌拾步外喝計水影沙灘伍頃陸拾畝課銀貳拾壹兩肆錢伍分至二十三年大丈計長叁千捌百貳拾捌弓廣伍肆百貳拾陸弓積壹百陸拾叁萬柒百貳拾捌步共陸拾柒頃玖

拾肆畝柒分捌厘零減課銀至拾捌兩伍錢伍分後漲冊丈註印冊

一結字壹號坐連李字號柳洲學貳拾陸股內得壹股西至李字號南至峯火磯東至洪山殿并宿字號今并結字號老洲直下北至馬當磯嘉慶二十三年大丈計長叁千捌百伍拾弓廣叁百伍拾壹弓積壹百叁拾伍萬壹千叁百伍拾步計伍拾陸頃叁拾畝陸分二厘伍毫課銀拾叁兩後變則增課丈註印冊

一李字壹號坐落繼定洲柳洲學貳拾陸股內得壹股西至大江南至峯火磯今至新港通江流水直上東至山今至結字壹號外水濠北至馬當磯嘉慶二十三年大丈計

長肆千弓廣疇壹千伍百玖拾弓積陸百叁拾陸萬步計  
貳百陸拾伍頃畝外噶計水影沙灘伍頃畝課銀陸拾壹  
兩後變則增課丈註印冊

一李字貳號嘉慶二十一年報漲卷在工房二十三年請  
丈入註印冊西至大江南至光字大江東至李字壹號北  
至馬當磯計長叁千肆拾弓廣四百陸拾弓積壹百叁拾  
玖萬捌千肆百步丈出地伍拾捌頃貳拾陸畝陸分陸厘  
零外噶計水影沙灘貳拾頃畝課銀肆兩貳錢柳洲學貳  
拾股內原得壹股丁世馥又將己名下股分內撥出壹股  
捐入柳洲學該洲貳拾陸股內柳洲學實得貳股

一出字柒號坐落中生洲柳洲學拾股內得陸股西至六

號東南北俱至大江嘉慶二十三年大丈計長壹千陸百  
伍拾弓廣壹百陸拾柒弓貳尺伍寸積貳拾柒萬陸千叁  
百柒拾伍步計拾壹頃伍拾壹畝伍分陸厘貳毫伍絲課  
銀拾叁兩伍錢後變則增課丈註印冊

一知縣顧鑒詳歸營側公基二方係左右居民立約賃造  
完租卷在工房

一陳善友獻歸校場路外公基一片造屋種園立約完租  
一生機山前草蕪一披南至正覺寺蕪東至正覺寺田西  
至王山北至何壩

一職監丁世馥誥職艾欽赤庠生凌健捐八寒字二十八  
號洲土十股內四股于嘉慶二十年奉撫藩府各憲批飭

變賣春衣書院分得價九八八錢叁千壹百貳拾貳千六百貳拾伍文其錢全數現存生息日後置買產業承爲薪俸膏火之資知府方體諭毋得侵挪花用卷存禮房

### 縣試考棚

嘉慶三年邑廩貢丁春位下捐出北門外基址壹方合邑紳士公同創建其基址弓丈圖見後

知縣俞昌言記國家承平百六十餘年矣稽古右文道隆政舉教士之法至密且詳立學舍以課之復設書院以肄之開鄉會以貢之先歲科兩試以取之其端必自童子始其舉又必自縣始則縣之爲試也重而試之爲事也嚴京師直省有棘闈學使者有試院邵及直隸州有行院惟縣

即以治事解試之士往往稱不便彭澤屬隸九江府先是府修行院邑士人剝金以助功竣而金有餘乃僉謀曰縣試舊在縣解皆自備几案或遇風雨殊形擾攘竭蹶狀盍以餘金建考舍乎予來宰之明年咸請於予予曰善獨念治事者必立乎誠則事易而功倍一事未舉而鼎新之使勿壞其在盍曰先甲三日後甲三日不可不占也一事既始而漸繼之使勿變其在異曰先庚三日後庚三日不可不誠也陶者旅者工者治者需若干若者掌簿書若者司出入若者辨物料若者督工匠謹事宜官吏不得擅其利而辨方定基尤在所先僉曰唯唯邑紳丁春子孫捐北關外基址一片於是以餘金爲之倡官廳俸紳士括廩餼不

役民鳩工庀材爲大門一列三門旁各有二房爲二門一門之中爲屏爲點名所左右爲門各一爲堂一堂下左右爲長舍舍列號號計一百五十有奇坐一千八百餘人設長几長櫬如號數嵌以石取其堅也後爲室爲閱卷所爲扇爲圍爲厠皆西向爲號舍南北向周繚以牆大門之外爲外庭庭外爲屏牆牆外爲洲洲皆植柳倚城面江鳳皇諸山環之經始於嘉慶三年六月告成於嘉慶六年九月財不殫而民不勞亦以見斯邑人士培風育才急公好義之誠也周禮大司徒大司馬之升大樂正小胥大胥之教黨庠術序之業鄉大夫閭司之掌今之學舍書院歲科試皆備之且當

盛朝文澤覃敷超越三代若斯之人才聿興學校昌正謂非爲宰之光歟而今而後開斯堂者興賢舉能思所以端其基宜何如之公且明也入斯舍者獻身誠信思所以兆其始宜何如之勤且思也過斯門者羣萃州處思所以務其本宜何如之勸且規也俾試重而事嚴以共仰副乎聖天子作人之化豈不懿哉是役也咸請記於予予邑長也例得一言勒諸石其工費若干捐輸若而人另有碑記倡建者某某董事監修者某某皆有勞績附書於後是爲記

考棚圖附



八號牛頭冲內山壹墩

呼名銀皮塢

九號晒柴塢山壹面

十號全處柴山壹面

共計紅契六紙山田陸地四至俱在契

以上每年議定柴庄并折租錢拾千零捌百文豐年不增凶年不減前九月交錢次年管業過九月不全交聽從另調此項捐錢歲歲所有永備考棚修理之費刊載一坊碑內其印契六紙存城內管賬人處輪流交接契當立有領收字免致失脫

一考棚按年租息除修理用度外餘錢詳登公簿又捐修省貢院餘錢九十貳千文於二十四年勒碑收存同登公簿生息以爲善後之資

冒考案山附

乾隆五十五年廩生歐陽嵩劉文劉蔽等稟皂快之子汪夢麟違例混考蒙 學憲趙佑奏辦檄飭該提調卽拿皂快汪會海并伊子汪夢麟到案嚴究分別革役滿杖責處永遠不准考試並提訟師辦理在案

冒考檄

照得本部院於案臨該府放告之日有彭澤縣廩生歐陽嵩劉文劉蔽等控皂快子孫汪夢麟卽卓茂違例混考一案當批汪夢麟祖父均充皂快在縣違例混考經衆廩保查出於府考時預稟扶出旣未與考姑免深求該廩保辦理尙屬認真卽九江府飭縣結案以免被累已發行該府

在案矣越今屆考竣未據覆到查歲科試爲士子進身之階分別流品最關緊要是以學政全書屢申條款凡各衙門充當皂快等役不但本身并子孫永遠不准考試教官廩保徇私混送均干嚴例府州縣官濫行收考處分綦重業已久奉凜遵本院歷任文衡俱檄行飭禁與匪喪冒籍竝嚴查江省冒籍尙少而匪喪不免經本院三令五申近已各知儆戒南九兩府教官廩保俱能小心查察惟隸卒賤役冒考一事則獨見於彭澤一縣致有汪夢麟以皂快子孫敢於違例冒考謬列前茅經合邑童生不肯互結廩保公具首告物議昭然自非妄控本院前批姑免深求者特以該府旣不准考事屬持正則於院考時已爲肅靜卽

該縣失察濫收處分尙可涵容免行咨會參處而已若該快役與該童之例應責處則自在該府縣之辦理不待另加詳示也乃於日內查問廩保等僉稱汪夢麟之父先因廩保首控不服反以挾嫌控縣批有果否挾嫌捏控之語該犯現又逃赴郡城見院批姑免深求輒敢在外聲言學憲已經寬免廩保等妄行阻考待回縣時我漫漫收拾他們等語雖此一面之詞本院尙未遽信但覆閱該生原控本屬理直情眞而該犯汪會海膽敢不安本分反行誣控且其詞內已有挾身充快等語卽係自遞供招該縣以本衙門役色豈有不識又豈不知皂快等役不准收考之例乃不卽當堂斥責而反批果否挾嫌捏控試問此尙有



何捏耶此正屬士林之所共嫌者何復問其別有他嫌耶以賤役而敢與衣冠爭抗藐視學校成何事體爲地方守令俱有維持名教之責寧可不嚴行懲創以儆愚頑爲此覆檄該提調卽飭挈汪會海一犯并伊子汪夢麟到案嚴究分別革役滿杖責處枷號通衢示衆並提訟師辦理毋任姑息干咎未便

冒捐案由

嘉慶六年廩生柯在培生員周卓然劉觀國萬騰聲等稟已革快役宋揚將子存熾借名出繼冒捐九品職銜蒙學憲吳烜批示斥革蒙 藩憲邵洪 撫憲張誠基批詳宋存熾雖經出繼終屬賤役嫡裔應按律擬議斥革卽便

轉行遵照追取原捐執照訊明違例冒捐實情錄供按律擬議通詳將宋存熾斥革照違例律杖壹百在案

已  
黃海縣志  
卷之三

